

31 JUL 2002

Mahathir-Asean/I

MAHATHIR KECEWA CADANGAN TUBUH SEKRETARIAT ASEAN+3 DITOLAK

KUALA LUMPUR, 31 Julai (Bernama) -- Datuk Seri Dr Mahathir Mohamad berkata beliau kecewa dengan keputusan menteri-menteri luar Asean menolak cadangan Malaysia agar sebuah Sekretariat Asean+3 ditubuhkan di Kuala Lumpur.

"Ya, kita amat kecewa bahawa negara-negara lain tidak berminat untuk melihat kewujudan sekretariat ini. Tetapi kita akan terus berusaha mendapatkannya," kata Perdana Menteri ketika diminta mengulas keputusan itu yang dibuat Isnin lepas pada Mesyuarat Peringkat Menteri Asean yang baru saja berakhir di Brunei.

Para menteri luar itu sebaliknya mahukan sebuah unit dalam Sekretariat Asean di Jakarta menyelaraskan kegiatan Asean+3.

Kepada soalan sama ada terdapat negara Asean yang melihat cadangan Malaysia itu sebagai terlalu "drastik", Dr Mahathir berkata mereka berhak mengeluarkan pendapat itu.

Beliau bercakap kepada pemberita selepas melancarkan kempen Utamakan Kelaurga-Semakin Hari Semakin Sayang anjuran Kementerian Wanita dan Pembangunan Keluarga di sini hari ini.

Dr Mahathir menolak tanggapan bahawa penubuhan sebuah sekretariat baru untuk Asean akan menyebabkan Sekretariat Asean hilang keberkesannya.

"Tidak, saya tidak fikir begitu. Asean adalah Asean, dan ini adalah Asean+3," katanya.

Asean+3 merujuk kepada 10 negara anggota Asean bersama Jepun, China dan Korea Selatan. Asean mengandungi Brunei, Kemboja, Malaysia, Myanmar, Indonesia, Laos, Singapura, Thailand, Filipina dan Vietnam.

Malaysia dilaporkan menawarkan dana permulaan US\$10 juta (RM38 juta) untuk membiayai operasi sekretariat itu untuk lima tahun pertamanya.

Mengenai cadangan Amerika Syarikat supaya sebuah pusat anti-keganasan ditubuhkan di Malaysia, Dr Mahathir berkata Malaysia akan menimbangkannya.

"Kita akan kaji cadangan mereka. Kita perlu tahu butirannya," kata Perdana Menteri.

Setiausaha Negara Amerika Colin Powell membuat cadangan itu dalam perbincangannya dengan Menteri Luar Datuk Seri Syed Hamid Albar di Wisma Putra semalam.

Dr Mahathir mengulangi bahawa Kuala Lumpur komited dalam perjuangan menentang keganasan.

"Dan, kita berpegang kepada janji kita," katanya.

-- BERNAMA

MAM ZS MAI